

松陽縣志卷十一

兵制志

兵防紀事

兵者國之大事先王不得已而用之者也若夫車書一統六合順軌無兵自固然居安防危有備無患況松僻在山阿寄籍人繁防衛之方所宜急講至其控制有術烽燧無警安堵之休賴干城之才一邑實式憑焉志兵制

兵制志一

兵防

松邑原制駐防把總一員

續設副防外委把總一員原設在城協防於隆隆二十

松陽縣志

卷十一

兵制

兵防

一

八年四月奉委移駐舊市鎮分防

在城及舊市共設戰守兵丁三十九名內戰兵十名守兵二十九名

舊志載額設戰守兵丁共一百名計在城一都戰守兵五十二名二都水車塘守兵二名三都非通衢無塘四都平田塘守兵二名五六七都無塘八都舊市塘外委一員守兵十五名九都至十二都無塘十三都白巖汎守兵五名十四至十九都無塘二十都石倉汎守兵十名二十一都無塘二十二都五尺口塘守兵二名二十三都裕溪塘守兵二名二十四都淨居塘守兵二名二

十五都無塘二十六都堰頭塘守兵五名茲查乾隆三十三年以後奉裁八折存兵八十名旋又裁存六十四名道光二十二年又裁存五十三名同治五年減兵加餉案內又照舊額裁減四成七年兩次收標共收戰守兵丁三十九名內松陽汎駐二十九名舊市汎駐十名糧餉兵米

戰兵每名每年餉銀叁拾兩月支米六斗小建扣二升守兵每名每年餉銀拾捌兩米同戰兵

舊志載戰餉每名年給銀拾捌兩守餉每名年給銀拾貳兩均月支米三斗扣小建同治五年改給今數戰糧

兵丁向無定額凡空闕處在於處鎮右營標下松遂宜三邑之守兵內有技藝嫻熟者聽候考選

駐防衙門一所在縣治之東鐘樓下明德坊

協防衙門一所在舊市

以上於咸豐八年匪擾焚折

營房墩臺共九處

堰頭塘營房墩臺一座

淨居口塘營房墩臺一座

裕溪塘營房墩臺一座

五尺口塘營房墩臺一座

水車塘營房墩臺一座

縣邸東門外墩臺一座

石倉塘營房墩臺一座

白巖塘營房墩臺一座

平田塘營房墩臺一座

教場在南門外赤塔埠嘉慶間水冲移在北門外

松陽縣額設民壯一十四名內弓箭手五名鳥鎗手五名

所有民壯一應旗幟器械俱於備公銀內置辦齊全

舊志

案汛防及民壯清季一併裁撤改設巡警民國紀元又

松陽縣志

卷十一 兵制

兵防

二二

改爲警察有時或調駐巡防隊添設保衛團以資防禦而兵防之制已屢更矣其巡警團練均附載於官秩志後茲不復贅

又舊志兵制志內列武功一門所載皆松人之有武職武略及其他事實者更覺礙不於倫今則改編於選舉志武職門及人物志各門以歸一律而刪去武功一門似亦較爲允當矣

兵制志二

紀事

宋

宣和三年方臘陷處州寇松陽尋攻青田燒燬縣治儒學
官民廬舍殆盡童貫等合兵擊之韓世忠擒臘誅之餘
黨悉平
時童貫等合兵擊臘於幫源洞臘眾尙二十萬與官軍
力戰而敗深據巖屋爲三窟諸將莫知所入王淵裨將
韓世忠潛行溪谷間問野婦得徑卽挺身仗戈直前搗
其穴臘就擒餘黨悉平

松陽縣志

卷七

兵制

紀事

四

青溪賊首洪載據松陽縣丞梅溶死之

時賊肆行劫掠郡縣嚮應據松陽溶率眾戰死有白巖
鄉民葉淳葉天麟父子鳩兵邀擊出境卒賴以安

元

至正十七年五月縉雲松陽遂昌麗水青田無賴各嘯聚
爲盜石抹宜孫胡深討平之

縉雲黃村松陽白巖村遂昌大社村麗水浮雲泉溪村
各羣聚劫掠勢甚猖獗以石抹宜孫爲行樞密院判官
鎮處州旣至置胡深行軍都事深攻泉溪拔其寨浮雲
亦敗白巖賊懼遂降黃村賊望風遁去深移師攻大社

賊首周天覺方友元傾其精銳迎戰深分部接戰伏奇兵夾擊之別遣遊擊入山搜其伏匿賊大敗斬首數十級生擒八百人獲方友元梟其首周天覺降乘勝移兵討青田賊黨金德安殺潘惟賢兄弟以降

明

永樂二十二年龍游柯山賊亂劫掠郡縣勢逼松陽士女逃奔鎮撫陳滋帥官兵勦平之

時賊勢猖獗東南震動所過遭其殺戮剽掠至松陽縣境人民皆逃匿縣治幾爲所據陳滋統所部兵出擊繼官兵四至合力併戰賊潰敗遂勦平焉

松陽縣志

卷十一 兵制

紀事

五

清

順治三年六月故明督撫田仰全勦鎮方國安等標下兵入處州散處鄉城大掠男婦皆逃匿

時江東糧盡兵自內潰田仰兵尙萬人方國安標下方國泰屠埒鰲等各兵俱不下數千乏食需索掠人家產甚者網綁獻銀始免民苦之逃匿殆盡

四年十月賊首洪舜等倡亂攻城游擊劉登瀛等分兵禦之圍解

十一月賊首洪舜復率衆犯松遂屯松之石倉源牛頭山等處游擊劉登瀛勦之擒洪舜寇平

六年八月賊首周君秀王大頭等作亂劫掠屯踞石倉源均溪羊山等處游擊劉登瀛黑夜攻破山寨寇散地方遂平

征勦歸城士民頂香接入各宰猪羊犒勞官兵遮道迎送至堰首而歸

八年八月賊首王應舉聚眾焚掠游擊劉登瀛督兵進勦於梅藤二村賊大敗應舉逃去大陰源頭地方遊擊劉登瀛沿路勦捕直至青田應舉計窮遂降地方獲安石倉一帶居民遠逃及見應舉獲降各歸家耕織安堵如舊

康熙十二年五月閩地耿逆據叛遣僞帥徐尙朝等陷龍泉隨陷遂昌松陽雲和景甯等縣十五年八月官兵雲集以次蕩平民始安堵

四十八年二月有閩匪彭子英等潛伏石倉桑嶺根爲亂經金衢溫處四郡官兵會勦悉平

閩匪彭子英潛伏石倉桑嶺根招集匪類爲亂經石倉鄉保報縣差捕役潘選顏慶往探賊覺誘役三人殺之復移據石倉蔡宅外社等處擾掠湯文雄率鄉勇禦之賊走雲和七赤地方過白巖犯遂昌界千總張君聘帶兵尾其後過於大柘張千總被傷金百總挺身赴鬪死

之分巡溫處道高公檄溫處金衢四府官兵及鄉勇勦之殲其黨於遂昌之坳頭嶺各處鄉勇據險以守賊窘餓士人吳時科生縛子英械之越月悉平

咸豐八年三月髮賊由衢州至遂昌二十三日竄抵松邑知縣張士超防堵界首戰敗死之增生周廷珪武生周廷球監生劉萬恩等同時遇害賊遂長驅進城教諭徐鶴振全家殉節六月初一日北鄉義勇約會遂邑民團力圖克復武舉李祥明武生李向榮等沒於陣賊因傷亡甚多亦卽遁往處郡初七日又有石達開股下由郡回竄至十九日官軍民勇合力防勦賊於是夜向龍泉

而去知縣張師呂來辦撫卹焉

咸豐十一年五月十一日髮賊由龍游之溪口直竄松邑午後城陷處州府李希郊邑紳葉維藩戰於堰頭死之賊眾盤踞年餘蹂躪益甚其時鎮軍林文察屯兵界首屢次接仗賊勢尙銳十一月十四日知縣李作幹遇害同治元年三都下田莊葉芳標邀集城紳饒慶霖等設局練勇保衛各村有鎗手楊致和技藝純熟每發必斃數人賊不敢至旋探悉城內賊首許應奎譚星等意見不合卽購募竊賊五名約期進城放火一面率領團勇會合官兵奮力攻勦六月十九日賊盡由宣而遁松邑

自此肅清知縣何仁杰入城到任曾元福袁良諸鎮軍亦於次年春凱旋赴閩矣以上舊志

光緒二年江山紅頭匪亂竄入遂昌邊界風聲所至古市一帶居民驚懼幸訊弁陳飛鰲募集鄉團預籌防禦匪知有備乃不敢犯

光緒三十年雙龍會匪首王金寶倡亂迫脅地方殷富聚黨多人城中富戶都有搬避至鄉下者人情洶洶幾至釀成大亂幸邑宰葉昭敦設法購線躡緝王金寶訊明確供就地正法餘黨遂爾解散地方於以敕平

中華民國元年時因革命獨立郡縣嚮應有某某名者帶兵到松盤踞學宮以殿廡爲營房以香爐爲刁斗蹂躪不堪居民惶恐幸有處州分府呂逢樵檄令邑紳潘錫圭包芝洲等招集鄉團維持秩序查緝匪類解散謠言鎮撫一邑民心始安

中華民國十三年八月福建軍官某某者由閩帶兵入浙前隊已抵龍泉沿途拉夫索食頗形滋擾十七十八兩日謠傳道經松陽十九日風聲愈緊至夜居民紛紛搬入山鄉城中雞犬一空各公署機關俱爲搖動幾於草木皆兵嗣聞該兵隊由松邑邊境從遂昌往龍游蘭谿而去居民始返鄉里照舊安業

